

TELE Greenland A/S

Ileqqusumik ataatsimeersuarneq

Sisamangorneq 14. maj 2009 nal. 14:00

Siulersuisut siulittaasuata nalunaarutaa

2008-mut ukiumoortumik nalunaarut TELE Greenland A/S-ip ataatsimeersuarnermi akuerisassatut innersuussutigaa. Nalunaaruteqarninni qulequttat pingaarnerit immikkut toqqakkat oqaaseqarfigissavakka aammalu ukiumoortumik nalunaarummi naqitami ingerlatsiviup sukumiisumik nalunaarutai innersuussutigissallugit.

2008-mi ukiumut angusat

Suliffeqarfissuup akileraarutit ilanngaatiginagit angusai 104,9 mio. kr.-it naammagisimaarlugit siulersuisut sinnerlugit oqaatigissavara. Akileraarutit ilanngaatigereerlugit angusat 70,1 mio. kr.-iupput.

Siulersuisut ataatsimeersuartunut inassutigaat 30 mio. kr.-it Namminersornerullutik Oqartussanut agguagarsiatut akiliutigineqarnissaat.

Suliffeqarfissuup 2008-mi akileraarutit ilanngaatiginagit angusai tamarmiusut 2007-imut naleqqiullugit 13,2 mio.-ninik ikinnerupput, tamannalu niuerneramik ingerlatsiviit TELE-p aamma POST-ip iluini pisunik assigiinngitsunik pissuteqarpoq.

Nalunaarasuartaateqarnerup iluani akileraarutit ilanngaatiginagit angusat 88,7 mio. kr.-iupput. Kaaviiartitat ilanngaasikkat 605,9 mio. kr.-iupput, 2007-imullu naleqqiullutik 46 mio. kr.-ininik imaluunniit 8 %-imik amerlanerullutik.

Naak nunatsinni nalinginnaasunik telefoninik atuineri akit 2008-mi junimi 55 %-imik apparneqaraluartut – aammalu nalinginnaasumik telefoneqarnermi kaaviiartitat suli appariartoraluartut – kaaviaartitat ataatsimut isigalugit annertusinerannut pissutaavoq mobiltelefoninik aamma IP-mik atuinerit¹ annertusisimanerat.

IP-mik atuneq sullissinerlu attaveqaatitigut aaqqissuussaanita piginnaanngorsartariaqarneranik nassataqarpoq, taamaattumik IP nioqputigut aqputigalugit nioqputinut allanut nalimmassaaniarnissaq pissanngikkutsigu pingaaruteqarpoq IP-mik atuineri kaaviiartitat annertusinissaat.

Internetimik qarasaasiakkullu attaveqaatinik atuineq naapertorlugu maannakktut isikkulimmik aaqqissuussineq, nioqqutinullu aalajangersimasunut aalajangersimasunik akeqartitsineq naammaginatut oqimaaqatigiissitsivoq.

Annertunerusumik kaaviiaartitsisoqaraluartoq 2008-mi angusap annikinnerunera, immap naqqatigut kabelimik aningaasalersuinissaq pissutigalugu aningaasanik attartortariaqarnermi erniat annertunerannik pissuteqarpoq – kabeliliineq tamarmi 750 mio. kr.-it missaannik akeqarpoq.

Pilersaarutaasoq sapaatip akunneranik ataatsimik sioqqullugu ulloq 23. december 2008 immap naqqatigut kabeli TELE-mut tunniunneqarpoq aammalu pilersaarutaasutut malillugit attaveqaatitut atulerluni ulloq 23. marts 2009. Suliaq aningaasat atorveqartussatut naatsorsuutigisat naapertorlugit suliarineqarpoq.

Pingaartumik internetip atorneranut akinik suli appaasoqartarnissaanik atuisut neriuuteqartuarput. Taamaammatt TELE-p 2009-mi januarimi nioqqut nutaaq, ADSL Premium, namminersortunut saqqummiuppaa, tassani annertuumik atuisut qaammammut aalajangersimasumik akiliuteqartitsinikkut atuineq ilanngullugu 60 % angullugit akikillisaavigineqarsinnaasimapput.

Inuussutissarsiummik ingerlataqartunut nioqqutit nutaat akinillu malunnaatilimmik appaanerit 1. juli 2009-minngaanniit atuutilersussatut siulersuisut aammattaaq Naalakkersuisunut qinnuteqaatigaat. Ilaatigut nunatsinni ilinniarfiit tassanga iluaquteqarluartussaassapput. Atuineq allanngornagu akinik appaanerup il.il. nalingata kingunerissavaa inuussutissarsiummik ingerlaqartut ukiumut 35 mio. kr.-inik sipaaruteqarnerat.

Soorlu nalunaarutigineqartareersoq, atuinerup annertusiartornera naapertorlugu TELE akinik appaanissamut siunnersuutinik nioqqutinillu nutaanik saqqummiussisarisarumaarpoq, taamaalillutik atuisut akit naammaginatut atorlugit internetimik atuiluarsinnaanissaat periarfissinneqarniassammat. TELE-p inuussutissarsiortunut atuisunullu ataasiakkaanut akit nioqqutillu eqqarsaatigalugit pitsaasunik periarfissinnissani sulissutigerusuppaa.

Tamannalu pissappat suliffeqarfissuup iluani aningaasarsiornikkut imminut illersorsinnaasumik ingerlatsinissaq pisariaqarpoq, tassami 2009-mi TELE-p aningaasaqarnermini unammisassai aatsaat taama annertutigaat. Aningaasanimmi amerlaqisunik attartorsimanerup nassataanik, kiisalu teknologiip nutaap atulernerata kingunerisaanik aningaasartuutissat amerliartuinnarput, taakkulumi sivikitsuinnarmik atorreqarsinnaagamik nalikillilerneqarpallattussaassallutik.

Aammattaaq TELE-p nunatsinni tamarmi nalunaarasuartaatitigut sullissinermini aningaasartuutit allarpassuit nutaat naammassisinnaasussaavai – aamma sullissinissamut akuersissut malillugu sumiffinni niuernikkut iluanaaruteqarfiginngisamini.

Allakkeriveqarnermi akileraarutit ilanngaatiginagit 2008-mi angusat 8,4 mio. kr.-iupput. Tamanna 2007-imi angusat akileraarusigaanngitsut 17,9 mio. kr.-iusut affai sinnerlugit ikileriarfiuvoq.

POST-ip 2008-mi aningaasatigut kaaviiartai 10 mio. kr.-it sinnerlugit imaluunniit 8 %-ingajammik appariarput, tamannalu allakkat ikiliartornerannik aammalu frimærkit nioqquteqartut naatsorsuutigineqartumik suli annikinnerusimanerannik pissuteqarpoq.

Naak pisuni POST-ip sunniuteqarfigisinnaanngisaani aningaasartuutit qaffapiloorsimagaluartut, POST-ip sukangasumik aqutsinermigut ingerlatsinermini aningaasartuutit tamarmiusut allanngujaatsissinnaasimavai. Allakkat ikilisimanerat angusani aammattaaq takuneqarsinnaavoq, 2008-milu nassiussinermini akimik qaffaasoqarani. Tamakku sanilliutissagaanni POST ajunngitsumik angusaqarpoq.

POST-ip suli ilungersuutiguarppaa aningaasartuutiminik annikillisaajuarneq aammalu immikkut piginnaasaqarfimmi iluani niuernikkut periarfissanik nutaanik ineriartortitsiuarneq.

POST-ip suliaqarfitoqaani tamani isertitat annikilliertortuarnerat pilersaarusiorsinnaaneranut ajoqutaapput, tamatumalu nassataanik annikillisaajuarnerup saniatigut akitigut nalimmassaanissaq pisariaqarpoq, POST-ip ingerlatsinermigut killeqanngitsumik annikillisaasinnaanngimmat. Taamaammat

siulersuisut januar 2010-miit atuutilersussanik akinik qaffaanissaq Naalakkersuisunut qinnuteqaatigaat.

TELE-mut aamma POST-imut sulisunik ilinniarsimasunik nunatsinneersunik suliaqarfinni arlalinni amigaateqarneq iliuuseqarnissamut unammillernartuuvoq. Suliamut piginnaasaqarluarnissamut piumasaqaatit qaffakkiartorput, ingerlatsiviullu sutigut tamatigut soqutigisaraa, sulisussat tamakku nunatsinniit pissarsiarineqartarnissaat, soorlumi aamma tamanna 2009-mi martsimi siulersuisut Naalakkersuisunut kalaalinngorsaaneq pillugu nalunaarusiaanni ersersinneqartoq.

Soorlu siusinnerusukkut aamma ersersereeripput, TELE-POST-imi iliuusissatigut qitiusut ilagaat, Kalaallit Nunaanni ingerlatsivimmi sulianik ilisimaarinniffiulluartumik avatangiiseqarnissap pilersinneqarnissaa. TELE-POST-ip kissaatigaa ilinniakkaminnik naammassinnerlaat suleqatinik misilittagaqarluartunik aqutsisoqarlutik suliassanik soqutiginartunik ineriartorfiusinnaasunillu neqerooruteqarfigineqarsinnaanissaat. Matumuuna inuusuttut ilinniakkamik pitsaasumik ilinniagaqarnissaannik aammalu sulinerikkut misilittagaqarluarlernissaannik kajumissaarumavagut, taakkumi suliffitsinni qaffakkiartornissami pigiliunneqaqqaarsimasussatut isigaagut.

Tamatuma illuatungaatus suliffissuup iluani piginnaasatigut aqutsisutullu ineriartornissamut ilinniarnernut suliffissuaq aningaasarpassuanik immikkoortitsisarpoq. Ilinniartitaaneq katillugit 7 mio. kr.-inik aningaasartuuteqarfiulluni 2008-mi aamma pingaartinneqarsimaqaaq. Tassunga aamma ilaapput sulianut aalajangersimasunut ilinniagaqarnernut aningaasartuuterpassuit, pilersaarutinut ingerlanneqartuurtunut amerlaqisunut aningaasaliissutigineqartartut.

2009-mut qanoq naatsorsuutigisaqarneq

Immap naqqatigut kabeli allallu aningaasaliiffiit annertuut kingunerisaannik, ingerlatsinermi ernianullu aningaasartuutit nutaat pissutaallutik 2008-mi



angusarineqartunut naleqqiullugit 2009-mi Nalunaarasuartaaserisoqarnermi anguneqartussat appasinnerujussuunissaat naatsorsuutigineqarput.

POST-ip avatitsinni annertunerusunik aningaasartuuteqarnerit allakkallu ikiliartortuarnerat pissutigalugit 2009-mi aningaasaqarnermini annikinnerusumik angusaqarnissani naatsorsuutigaa.

Naggataatigut sulisorpassuit pikkorissut aqutisullu ukiumi qaangiuttumi sulilluarsimanagerat pillugu qutsavigiumavakka, aammalu siulersuisut tamaasa TELE-mi POST-imilu suliarpassuit pillugit suleqatigilluarsimanagerannut qutsavigalugit.

Kaj Egede

Siulersuisuni siulittaasoq

ⁱ IP atorlugu sullississutit: Pingaartumik ADSL aamma MPLS internetimut kiisalu MPLS-imut – VPN qarasaasiap atorneranut.